

# ●歷朝憲章類誌

潘輝注著

按潘公著是書攷據該博記載詳明。爲我國最有價值之著作。譬之麟角鳳毛。不可多得。惜當時書成上進。藏之秘閣。迄未付梓。國人得讀之者鮮。研究史學者引以爲憾。茲將舊抄本校訂正確。陸續登錄。以公諸世。閱者能逐期裝集成卷。可期完璧。置之左右。以備參攷。費小而效大。亦學界之一大快事也。

楚狂識。

## ▲附錄公之姪孫光祿寺少卿潘輝濤先生所錄寄公之小傳及進書表如下

### ●梅峯公小傳

公姓潘諱輝。注字霖卿。號梅峯。其先父安人。遠祖謹遷居山西省國威府安山縣栗柴總瑞圭社。景興壬寅(二二三)年冬生。少有文名。嘉隆丁卯己卯科並中秀才。明命元年薦歷朝憲章一部。二年召補翰林編修。歷官承天府丞。明命九年廣南協鎮。十年兩奉北使。尋因被譖。効力如西。十五年開復工部司務。以足疾乞休。授徒于先豐青梅。明命二十一年卒。壽五十九。公秉性方剛。兼有書癖。不以權利關心。頗爲衆嫉。獨蒙聖祖仁皇帝簡眷。有降隨升。其後次奉使係奉特批。廷臣以秩卑對。卽奉擢授侍講充使。公前被革。初蒙開復。其寵遇類如此。後來再跌。方蒙起用。卽以疾休。公意蓋素淡於世味。云平生文章甚多。惜其不能搜集。如平定歸裝。華輶吟錄。華輶續吟。洋程紀見等集。今亦不存。至若歷朝憲章一部。尤爲經濟之學。當時朝廷政務藉以稽查。御批越史太半引註。嘵公殆所謂不朽者歟。輒敢奉誌以見公文章事業之大概云耳。附按公原名「浩」。其後避諱改「注」。又公所著之皇越地輿誌。華輶吟錄。華輶續吟。洋程紀見等。今亦有存。唯平定歸裝一篇。則絕不之見耳。

### ●進書表

時明命元年公奉旨召回京。進歷朝憲章一部。蒙賞銀子三十兩。紗衣一襲。燕筆三十枚。燕墨三十九。

伏以桂疆恢拓。幾經制作之文藝圃編摩。冀達光明之燭。煌煌巨帙。耿耿微衷。臣竊惟歷代有興莫

不觀會通而行典禮。隨時所尚。皆能立綱紀以貽子孫。體不同或革或因。書具載可徵。可則想一千載餘之規模自別。政案然禮樂典刑。顧二十年前之變故相尋。事杳矣。丁黎陳李漏逸。難搜於故典。式稽曷備于明時。儲謾談世族故家。遺文闕而塵埋金石。事空托殘編斷簡。雜錄亡而迹混魯魚。考古何從折衷。有志在所竊嘆。臣頃因肄業。癡抱遐思。謂故典茫茫。縱匪分條而析縷。卽見聞貿貿。奚由博古而通今。刮磨爰勵研求。綴拾自忘固陋。考訂閱十秋寒暑。朝刪暮繹。此精神稟括。兼六代條章。類別彙分。皆要典評論。時加臆說。貫通粗號成書。雖汗青不敢擬於西藏。顧芹曝寔欲登於乙覽。茲蓋伏遇

皇帝陛下。乾元健運。聖學高明。新德正在初。卓然準先王而鑒往古。多聞惟建事。直將彌六合而混九州。經綸天地大規模。包括昔今神宇量。文治重增丹牘。貢清明肇拓之前功。徵書下逮邱園。起墳史晦藏之遺士。時孰不激昂而思奮。分別承簡顧以邇趨。臣幸奉綸音。獲瞻粹表。披丹誠於一部。敢叩闔闈陳稽古之思。祈睿鑒于九天。願將典型贊興平之化。臣所有歷朝憲章一部。該千卷。謹奉上進以聞。

# ●歷朝憲章類誌序

臣聞致知之學。憲章其大也。夫子曰。博學於文。所謂文者。蓋古今事理之宜。國家典禮之要。儒者讀書於經史之外。尤宜廣訪旁搜。遠求近取。考究而折衷之。庶幾無愧博學。豈徒摘章句掇詞藻而便謂之文哉。惟皇越之立國也。自丁黎李陳風會既開。一代各有一代之制。迨至有黎興建。顯設法度。詳備聲名。文物之盛。不讓中華。凡建官之方。取士之法。制兵理財之規。爲國交鄰之禮。靡不各具條章。均有典要。蓋自洪德裁定後世。率由其間更歷英君。誼主之斟酌。名臣賢輔之建明。三百餘年。維持遵守。所謂典禮之相因者。損益蓋可知矣。惟歷朝會典。從前未有成書。編年國史之記。猶多疎略。况自丙午兵興以來。舊章散逸。其略有存者。故家世族之藏。斷簡殘編之載。又皆旁雜訛舛。未有頭緒。談歷代之典故者。茫無依據。然則緝見聞別事類。以爲典憲一書者。斯非學古之當務歟。姑舉大要。言之如封域之肇建。分合不同。人才之收採。先後各別。建官則有品秩職掌之分。定禮則有廟祀郊社之制。設科目則選士之規有詳略。制國用則取民之法有輕重。刑以輔治而刊定之律或殊。兵以衛國而設置之名不一。以至歷代著述之書籍。北朝接應之儀文。是皆典章攸係。考古者所宜講求。而訂正也。李陳以前。舊典脫亡。脫一作既大略惟見於史。黎朝創業中興。條章猶在。然其散見遺編。殊無統紀。自非著意搜求。多別區類。未易以稽考也。臣幼知學。卽常有志。幸承積世之儲。趨庭之訓。其於典章粗窺端緒。每恨史籍散漫。未遑纂述。入山以來。乃始杜門却掃。劬力搜採。書課之暇。輒復隨類考訂。間有潛思所得。却著議論。日積月累。蓋經十年于茲矣。編錄既成。凡十誌。曰地輿。曰人物。曰官職。曰禮儀。曰科目。曰國用。曰刑律。曰兵制。曰文籍。曰邦交。誌各有叙。以述大意。每誌之中。又分節目。

彙別而條貫之。名曰歷朝憲章類誌。書凡四十九卷。嗟夫。著述之難。昔人所慨。况乎典籍散逸之餘。而欲融會古今。條別事故。集千載之遺文。以成一代之通覽。此雖淹貫巨擘。猶以爲難。區區末學。何敢與議。姑以掇拾見聞。備資脫漏者耳。雖然。迹考於古。而不敢誣。事折於理。而求其是。或詳而不至。於繁。或略而可舉其要。使歷代制作之迹。粲然足徵。皆于是書乎。在幸得上達高聰。備經睿鑑。稽式修明。庶亦可爲王政之一助云。

臣潘輝注謹序

### ▲類誌次序引

自有天地。卽有山川。星土既分。封域各別。一國有一國之分野。定疆界而區別。畫之。斯建邦之先務歟。我越從前界於一作在要荒。風氣後於中州。商周以前。尙爲龍蛇藪澤。當其時也。川陸雜處。山海分居。疆理蓋未詳也。迨文郎建國。諸部始分。邃古規模。猶皆約略。其後合于蜀併于越。而漢取之。歷漢而晉。歷晉而唐。七八百年。迭爲郡縣。悠悠南服。徒胥守牧之治。其有自奮而出者。則乍起乍滅。終不能脫羈縻。以立疆宇。豈非天時未至。而地運之有所待歟。丁興而混一。黎繼而恢拓。我越封疆。始歸底定。至于李陳之迭起。抗衡宋元。黎祖之勃興。蕩平明寇。運會旣昌。土宇日廣。北人震竦。遂不敢復萌郡縣。我國之想。而南越封疆。雄視華夏。傳曰。開闢以漸。有如是夫。其疆界之分合。山川之險夷。當先考其大要也。作地輿誌第一。

有天地斯有人物。林林而生。總總而羣。必有君長以治之。帝王司牧而統。衆相將左右以保民。復有道化節義維持其間。然後國家可得而治。我越立國之初。風物淳厖。習俗簡朴。當時君臣相與優游。

至德無迹可見。世尚洪荒。非後代可稽考也。降于內屬之時。姑且勿論。自夫丁黎李陳受命迭興。至于有黎肇造。相傳歷世。其間英君賢輔。良佐名臣。先後相繼而出。凡其功迹之嘉節行之懿用。能經國以匡時。勵俗而垂教者。徵之簡册。猶可想見。非後人之所當取法乎。夫以在上之道。與治同體。而後興在下之道。爲臣止忠而後善。與夫爲儒之須有蘊懷。臨難之當思節操。莫非天典所存。不可踰越。採擇而登載之。以爲憲法。於是考鏡而取則焉。則經濟之獻。可以得其本領矣。作人物誌第二。

朝廷上下分職以治。萬事始得而理。官職之所由設也。蓋自誰侯。誰將肇始官名。而太古之初品秩未具。其後一代肇興。必有一代之制。李之建立。異乎丁陳之建立。殊乎李黎初。則多因陳舊而後始更張。黎末則雖本國初。而率多增置。沿革之宜。稽史籍而可見矣。然其設官也。職掌則互有詳略。爵級則迭分高卑。祿秩以厚之。而恩典之例不一。賞罰以旌之。而黜陟之法或殊。上下千百年間。名類繁多。品式詳備。非聯而通之條而別之。不足以見職制之大要也。書曰。稽古建官。庶政惟和。增損繁簡之宜。要在隨時酌應。至其大體大綱。所以立政用乂者。可不法古以建事。故考官名定職事。乃爲治之大要。作官職誌第三。

天高地下。萬物散殊。而禮制行焉。禮制者。所以定天下之分也。王者興建顯設。何莫非禮。而其見諸衣裳與服之制。廊廟吉凶之禮度數儀章。各有品秩。是皆典憲之大經。不可紊舛。故爲國之禮。必先致慎。諸此。李有通制之定。陳有常禮之刊。節目儀文。雖皆備具。而全書散逸。其詳不可考矣。黎朝一代。斟酌條定。禮制號爲詳備。故其章庸而品秩明。饗祀而神祇格。慶燕有以治羣情。吉凶不致違古制。歷代相因。遵行不越。雖未能盡合先王。亦足稱一代之典禮也。惟自中興以後。權柄漸移。名分之

間。未免紊亂。其衣服之制。冊封之儀。多僭紊失度。王之與帝同尊並上。而天秩之禮漸以陵移。紀寔而訂正之所以扶皇綱也。其餘節目甚多。儀文甚繁。類列悉登。以見國典之不可闕。作儀禮誌第四。典禮待人而後行。而取人之道。科目爲急。自鄉舉里選之法廢。歷代求才要皆以是爲重。士之宏才博學。固多從此出焉。黎李以前。未有試法。至于有陳。始設科舉。分甲第。人才之得多有足稱。黎因之增置諸科。而三年一試之例。洪德始定。當其時也。賢能輩出。英俊彙興。用以笙鏞治化。黼黻鴻猷。四十年之致平。數百世之貽澤。皆賴科目中人得人之效。不甚盛歟。迨于僞莫僭干。亦設科舉。登其選者。率多良士。資以維持國祚。不爲無助。莊宗續統清華。未遑文事。中宗順平。始置制科。取士光興滅莫以後。復遵舊制。行之既久。得人爲盛。然其風會旣移。文體日變。人才之多不能以比古也。蓋上之考試。或殊士之趨向亦異。取其淹貫宏博。則寔學者不苦於簸揚。拘於摘句尋章。則奇才者常遺於衡尺。觀前後取人之多少。而知試法善否之懸殊。所謂關世運之盛衰。可不重歟。其法之疎密。例之詳略。當考其沿革也。作科目誌第五。

何以聚人曰財。傳言理財。繼於用人。蓋王者畜養斯民之本。必資財用。居天下之上。而爲制國之方。閱戶口以詳登耗。定稅課以明多寡。謹權量之征。通海山之產。制節謹度。量入爲出。斯乃王政之所慎也。夫以四海之廣。乏財固非所患。而立善治之法。理財當有其方。惟當因天地自然之利。立經常簡易之規。使之下不病民。上以足國。古之道御權用。何莫不由斯乎。李陳之時。取民皆有常規。而叛籍隳壞。僅聞其略。有黎一代。法式詳定于洪德。後來更改於中興。其閱戶籍也有繼修平例之殊。其定稅法也有寬賦加租之異。莫非隨事斟酌。因時更張。蓋其合於古者。或不可行於今。宜於後者。

一作知一作

或不必膠於古。酌應而變通之。要在宜民適用而已。至其開貨幣之原。通商賈之利。定天下之所納以爲正供。約一歲之所在。以爲經費。歷代注措。具有節目。不可以不究也。作國用誌第六。

易曰。理財正辭。禁民爲非。曰義。夫利之所在。易以爭奪。要必分別是非。明致禁令。以齊其不可導者。而後萬民以治。故言禁非於理財之後。蓋刑罰之不可無也。粵自李陳立國。各有一代刑書。其詳雖具。節目蓋纖悉矣。中興以後。率循舊典。迨夫永壽景治之申明。正和保泰之準定。勘斷律例。詳悉靡遺。金科玉條。昭昭成憲。百有餘年之間。時復振作而申飭之。彝章之具在者。固莫得以踰越也。嗚呼。刑書之作。所以防民。三代以來。有國者之不容闕也。其條貫之定。不可不詳。作刑律誌第七。

寇盜姦冗之患。刑之所不能制者。必以兵治之。虞時以士師董兵。至周司馬統師列于夏。官兵政之詳久矣。用以征不庭。禦外侮。國之大事在是。其畜養之制。區處之方。御之可不思其道哉。李陳以禪得國。開創之始。兵力不勞。至于守成之後。破宋摧元。威聲震薄。無他治兵得其道也。有黎創業中興。皆以百戰間關。而後蕩定。其兵力之強。可謂盛矣。然其後也。軍有所挾。積成驕弄。永壽以降。漸出鉛鍵。至景興之末。三府兵變。矜功玩恣。不可復制。而國隨以亡。嗚呼。備監興亡之迹。其可不謹於御兵哉。歷代制兵之法。其與養給練習講閱之方。備有節目可考。當稽其始末也。作兵制誌第八。

古後政事。必有書籍記之。然後治亂可知。興衰可監。典籍者。所以萃萬事也。丁黎以前。我越人文未暢。自夫李陳迭興。文物稱盛。英君良臣之撰述。名儒碩士之發揮。四百餘年蔚然可覩。迨于有黎洪德。運會大亨。典章之盛。君刊述于其上。辭藻之鳴。臣溪應于其下。書籍之多。猗歟休哉。而累經喪亂。

屢致散逸。惜其不多見也。雖然遺編斷牘之留。猶有可考。其略有存者。固皆古人性靈之寓。可使之聖沒而不傳乎。中興以後二百餘年。書籍亦多可錄。晚黎文運稍復通暢。其間有覃思於經史。有鳴長於詩文。著述諸篇。皆有足採。兼載而類列之。誌其書目大略。以明作者之心術也。作文籍誌第九。內事既舉。而交鄰事大之道。尤所當謹。凡文詞之復。使命之通。邊方窺其強弱。國體係以重輕。講信修睦。此其大關鍵也。我國肇服南邦。古稱文物。雖遠在海外。而中國常以儒雅見推。自丁黎季陳。迭膺封冊。顯號貢于華章。寵數光于銅柱。其貢聘之禮款接之儀。歷代隨時酌應。要皆不失國體。取重于人。迨于有黎創業平吳。而講和至勞委曲。中興滅莫。而名義必費辨明。當時文辭往復。咸中密會。卒能轉干戈而玉帛。弭兵車而衣裳。詞命能國之效。蓋可見矣。至如北闕貢賀之表章。使部往來之典。例邊疆經畫之事宜。歷朝遺文。猶有可考。是皆稽古之所當備閱焉。作邦交誌第十。

### ▲凡例

一 凡是書所載事迹。上自遠古。下至黎末。徵引務在典核。其諸史議論有發明者。亦並採入備覽。間有是非可正。則竊以已意權衡辨論。其下標一

(按)字爲別。蓋揆度事理。求歸至當。非敢妄逞雌黃。

一 輿地誌。備載地名沿革。及諸山川景致。俱有確據。惟風土則或詳或略。不能盡備。姑闕其不知者。待後增之。

一 人物誌。帝王則備配次。先人臣則類選名賢。備記者略舉大綱。類選者詳載事狀。蓋人君行事。具有國史可考。惟諸臣始末。史記未備。故凡一言之嘉。一行之懿。悉以類登。所以表德業也。

一 官職禮儀之誌。條目繁多。非廣搜博載。不能詳備。故凡職掌儀註。一一登錄。用以稽政事。察儀文。庶無遺漏。

一 諸誌中詳探事故。兼錄文辭。凡歷代詔令章奏。有關典要者。一切收入。及名公巨儒。詩文可錄。亦皆類載不遺。秋毫春花。隨意並採。庶幾不落一偏。

一所證北書周禮二十一史。文獻通考。大學衍義補。大清刑律諸部。其餘引用我國史書。目錄具在文籍誌。不復贅述。